

[Augsburg], 4. Dezember 1551

An Johannes Oporinus

UB Basel, Fr. Gr. I 11, fol. 156r-v.
Steinmann Nr. 656.

S. P. D. Vascosanum non tam tibi gratificari, quam Strazelio aut Danesio, facile credo. Scripsi Danieli Oesyandro nostro vt libros nostros ab eo reposceret, secumque huc afferret. An autem a Vascosano impetraturus sit, dubito. Nam qui semel frontem perfriuit, sui similis esse perget, his praesertim temporibus, cum leges inter arma silent, et commercia Gallorum cum Germanis sublata sunt. Sed, vtrum fecerit, prouidebo quantum potero, vt existimationem meam contra et illius et aliorum tum insidias tum iniurias sartam tectam conseruem. Nemo vnquam mihi persuasisset, in tanta Vascosani humanitate, φιλοξενίᾳ, χρηστολογίᾳ, tantum fraudis latere, ne grauiore verbo vtar. Quare me arumnarum mearum, quas tuo et illius impulsu peregrè, affecta valetudine, commodis meis neglectis, atque etiam genio defraudato, sustinui, valde paeniteret: si, quae facta sunt, dolendo infecta fieri possent. Νῦν τὰ μὲν οὖν προτέτυκται ἔάσομεν, ἀχνύμενοίπερ. Tui libri quos ad me mittis, grati mihi sunt, sed dum bibliothecae domini praesum, non desunt mihi libri. quare non opus est te mea causa facere sumptus, aut amicitiam nostram mercenariam putare. Ac me nihil tibi prodesse posse doleo, sed, si quid potero, αὐτὸ δεῖξει. Scripsi nuper Salmingerum de Lazij libro nondum quicquam impetrasse, sed spem de domino meo non malam habere. Hodie petebat a me, vt ex te cognoscerem, quantas fore illius operis impensas crederes, quò commodius tuam causam ageret. Reliquas Demosthenis chartas nondum accepi, nec fasciculum librorum ab Oesyandro missum, qui se Appiani duo exempla vel ad te, vel ad Frobenium (non enim certò memini) misisse scribit, quorum alterum mihi reddendum, nondum accepi, accepturus fortasse propediem. De literis meis Argentinam missis, gratiam habeo, et oro, vt Francofordiam proficiscens, Argentinae D. Conradum, et Francofordiae Petreij successores aut procuratores rogandos cures, quid de literis meis et Demosthenibus Argentinae reddendis actum sit. Nam vel intercepta esse vel perijsse omnia vt existimem, non leuibus coniecturis adducor. Sed eam iacturam facilius feram, modò tu cum tuis atque alijs amicis, in ista grauitate ? maneatis incolumes, quod a Deo opt[imo] max[imo] precor. Vale. Pridie nonas Decembris Anno 1551. Ad alios scribendi tempus non fuit, quare d[ominos] et amicos meo nomine salutes velim. Literas ad Apianum misi, vt iussisti.

Hiero[nymus] Wolfius.

Latomus commentarios edidit in pro Cecinna Argentinae impressos, de Camerario nescimus. Sed eius pro Murena annotationes ad te mitto, si forte in nominibus errâsses.